

四庫全書

集部

欽定四庫全書

歸田稿卷四

明 謝遷 撰

像讚類

陳都閩像讚

雅志詩書折衝尊俎名重縉紳威加行伍為國爪牙傳
家簪組篤生賢孫克繩祖武轉餉有經粵維政譜萬艘
一麾世澤斯溥嗚呼此其遺休餘烈猶兄起吾敬于瞻

睹

此吾浙都閭朴菴陳公遺像也公雖世承武弁而惇
尚儒雅為縉紳所重予初登第時公方總浙漕來京
每接其言論倏忽餘三十年公捐館久矣而其孫汝
玉克紹前烈復以都閭之節總漕事茲予謝事南歸
適汝玉漕事竣獲與並舟而南閭出公像示予感念
存沒不勝愴然敬為題此

楊先生小像讚

名池字
一清

學足以潤身而不飾其外才足以致用而不諧于時袖
手靜觀有眼空塵表之意掀髯高詠或時出胸中之奇
固宜鄉邦稱之為碩彥而子弟尊之為嚴師也歟

自題野服行樂圖

才乏經綸器非瑚璉意廣智疎量狹中淺幸際昌期濫
叨盛選跡誤廁于廟廊榮謬膺夫軒冕固知小載不可
以大受而綿力不足以致遠每臨事而兢惕恒捫心而
懷赧徒追先皇之殊遇欲圖報塞而強免結舌之際持

論侃侃匪躬之故遭時蹇蹇觸危機而罔恤當逆鋒而直犯豈見可而忘難惟以縮而自反向非聖明之護持蓋將大僂之不免既蒙庥而瓦全亟奉頭而鼠竄寂寞之坳寬閒之畎農圃是親麋鹿為伴苟藏拙而引恬因習閒而成散謝世路之紛華遂平生之疎懶肆川泳而林棲玩霞舒而雲倦振素衣于高岡濯漱纓于清澗藉嘉蔭以夷猶求素心而往返遵王路之平平履幽貞之坦坦內深省乎百愆德敢忘乎一飯時歌咏夫太平聊

優游吾衰晚

東谷像讚

克積之學見于文詞和粹之德發于威儀才固足以致
用志亦存乎濟時何聞譽蚤重于鄉邦而選舉竟詘于
有司噫崑岡玉韞滄海珠遺寶維輿論寧獨舊知豈天
有意于後學故留此耆宿之師耶

邵憲副先生像讚

文實方伯之祖

溫溫恭人謙謙君子是固其德之厚也邁羽臺端蜚英

翰苑抑又其才之茂也敷歷荐久偃蹇而休尤足見其
端確之守也既豐其積乃嗇其施豈天將大昌其後也
堂堂遺像端拜仰止是惟先光祿莫逆之舊而實吾鄉
邦前輩縉紳之領袖也

邵封官像讚

文實方
伯之父

蚤閑庭訓無忝所生晚貽燕翼有美其承暢襟懷之坦
夷谷空川曠偉儀觀之豐碩鵠峙鸞停笑傲優游雖卒
老子泉石褒封赫奕終不失夫簪纓嗚呼斯人也其聖

世之遺逸吾鄉之耆英也耶

王文煥像讚

蚤志存乎用世學亦勤乎明經豈賦命之不辰胡名乖
于垂成既削跡于場屋遂寄傲于棋枰生不事夫產業
惟優遊桑榆之景言不阿其所好抑庶幾月旦之評年
幾大耄動若後生蚤暮善飯几杖靡憑人徒見其矍鑠
或猶訝其寧馨不知胸次之蕭散直任性真之流行是
誠無忝于三槐之華胄固宜時稱為四明之耆英

銘類

古愚齋銘

吾邑張駐泊氏以醫名世守惇恪其聞孫曰淵字德深
尤白眉之良乃以古愚自號其志蓋將紹先德而矯頽
俗可嘉也予故為銘其齋以勗之銘曰粵稽古初風氣
未闢民生多愚其愚也直乃賦或偏匪貌斯飾渾然天
真其究安宅世降日污淳風漸忒外貌若愚中心孔棘
機巧橫生奸偽百出舉世滔滔莫知其極維駐泊孫思

紹潛德業儒用醫居今稽昔抱仁以施活幼是力劑不
妄投方傳思邈藥不二價信慕康伯行類迂踈衷全隱
惻曰愚自將繫古乃則古愚伊何厥初罔易絕慧棄智
惇孚秉塞詘華去浮蹈惴履幅彼巧我拙彼佞我默不
徑不竇不逆不憶志則移山心靡轉石終日不違千慮
一得是謂古愚允維矜式懋哉爾承永延世澤

詞類

戊寅臘月予幸七十初度同年王守谿少傅寄梁


州序為壽依韻奉答

茫茫江海悠悠昏旦歎惜年光易換迷途世故從來百
樣千般眼底翻雲覆雨狂浪顛波天也那能管白雲堆
穩也與公眠吳越相望兩地仙傳雅調正家宴便當筵
高咏愁懷散賡一闋竇強健

守谿明年亦七十中秋後二日其初度也仍用前
調一闋寄壽

中秋前夕今辰初度萬里清光快覩香生叢桂廣寒真

境清虛但見斗牛相映奎壁聯輝元是文章府洞庭深
處好勝蓬壺青雀西來蚤寄書王母降玉娥舞笑鶴南
飛曲吾來暮遙祝讚壽彭祖



歸田稿卷四

欽定四庫全書

集部
歸田稿卷五

詳校官中書_臣瞿照

中書_臣劉源溥覆勘

總校官進士_臣繆琪

校對官檢討_臣李學錦

謄錄監生_臣左熙世

欽定四庫全書

歸田稿卷五

明 謝遷 撰

五言律詩

過彭城驛哭恒孫二首

辛亥年省親還京女孫恒奴沒于路寄葬驛邊鐵佛

寺

憶昔過彭城吾孫禍獨嬰倉皇埋旅櫬嗚咽赴嚴程骨

肉久應化星霜條屢更傷心此停棹老淚強吞聲

野寺鄰荒驛孤墳出短垣老懷難割愛舊鬼亦煩冤歲
晚鄉心迫天高淚眼昏哀歌不成調為爾一招魂

哭母舅二首

諸舅惟公在清強步履便承顏如見母抱恨又終天白
鶴歸何處青山入暮年傷心誰共語涕淚獨潛然

陟屺已無地私情尚渭陽十年違杖履兩鬢各星霜壽
筭期方遠仙遊別遽長西風撼秋木悽斷老烏腸

鮑魚餽雪湖辱詩見貺依韻奉答

賓館無魚日馮謹歎孟嘗淵臨輸結網芹獻侑稱觴鄉
社新詩券烟波舊釣航海鮮甘住久筌在敢相忘

汪進之通判重慶堂次李西涯韻

鄉評推世德家慶擅華名桂籍方鍾秀蘭階賸茁萌祿
分三釜足官喜一身輕

時進之已棄官歸養故云

猶憶班衣後趨隨

進壽觥

和雪湖冬菊一首

寒徑餘香滿疎簾倒影高詩狂仍落帽酒債擬償袍第

金史卷之五
品增新譜餐英按古騷同心不同賞望眼為君勞

素箋餽雪湖辱詩來謝次韻答之

華篇酬素楮使至一舒眉悞此瓊瑤報慚非玉屑姿粗
疎承用乏雅澹慰心知聊伴中書老清風舊鳳池

雪湖詩謝穀種次韻二首奉答

歎歲僅存種先春蚤力蓄歸耕雅同志敷播合乘時今
雨應非昔公田遂及私秋成倘如願再續屢豐詩

取盈傷往歲作苦念荒畝鄉井通吾力鉉基待此時嘉

禾原有種大造本無私飽飯西成日從公細和詩

和雪湖屏跡二首

林臯聊寄跡瀛海久忘情卻老方頻檢耽詩癖已成晴
山雙屐穩烟水一舟輕日上眠猶熟心閒夢亦清
谷口藤蘿密雲間碓磴幽萍開喜魚躍花褪怪鶯流自
與青山約誰因白髮愁閒身習成懶君莫笑科頭

恭和御製除夕詩韻

宇宙三陽泰衣冠萬國來皇圖真永固聖德厚加培麗

日無私焰明廷足俊才老臣慚朽拙遭遇亦奇哉

和除夕詩

大道今猶昔青陽往復來八荒歸至治萬彙賴深培天
啓重熙運川慚巨濟才交修佩明訓寤寐敢忘哉

和羅峯先生新春詩二首

太簇初回律明堂恰祀春微風來淑氣光霽浥輕塵惠
澤行多慶豐占信有神閭閻歌頌滿聖德與時新

生菜堆盤細新醅溢甕香迎春先鳳沼退食總羔羊宣

賜真殊寵官寮合對嘗
素餐慚莫報醉飽熱中腸

和羅峯郊壇韻

圓丘分獻爵平步上天梯
野闊旌旗擁壇高象緯低
塵埃九陌淨干羽兩階齊
禮畢候回輦虛憲聽曙雞

五言古詩

暮宿扳魯渡口

水洄舟易膠舟人時復喧
暮阻沙岸側野曠地亦偏
問津尚云遠西日已含山
寒林北風急飛鳥盡來還
泊舟

悔不蚤兀坐默無言

慈節為朱彥明乃堂作

苦節良獨難慈訓尤不易有兒歸義方庶矣栢舟誓首
年未亡身祇為家門計于今幸兩全辛苦遂初志他年
泉臺路良人見無愧

蚤過山庄避暑用陶韻

侵晨理孤棹山居將避喧好風忽南來吹我烏帽偏宿
鷺未移渚落月猶在山候門兩稚子問我何時還高山

與流水此意向誰言

山亭晚眺用陶韻

山中多白雲深谷芝可採
吾慕陋巷賢簞瓢樂不改
塵世饒風波桑田倏成海
人壽知幾何河清詎能待
淡薄順吾常庶矣寡尤悔

和答雪湖見懷及述懷各二首

束髮履宦途妄意遵伊周
遭逢悞明主黽勉三十秋
乞骸賦歸來荒蕪念田疇
所學期不負此志終遂否
飄飄

金史卷五
赤松子聊復從之游

投簪事耕稼菑畝夾道周禾黍日以長少昊將司秋農
興出門巷杖策臨西疇俯首問童僕塲圃各具否屢豐
幸遂願社會尋舊游

馮公夙勤業雅志存孔莊高才不獲展皮裏餘陽秋歸
來守衡茅心田盡平疇世人知者寡蒼天亦知否食報
諒在後卒歲仍優游

南華發高論吾昔聞莊周朝菌無晦朔靈椿八千秋塵

世一夢幻彭殤杳難疇達生貴及蚤君已洞此否往者
亦已矣且復同歡游

舟至直沽長子正來迎喜而有作時正自家來省
先還至德州聞子得請復來迎也

維舟向天津潮落日已晚燎火明渡頭大兒忽在眼離
合豈偶然慚愧勞往返骨肉保團圓今幸遂初願喜極
翻成悲相看淚如霰秉燭坐忘眠卻怪寒更短

冬日過山莊感興二首

山居寡人事初冬風日佳霜林闌紅葉時復墮空堦興
至不自懶策杖臨水涯潛魚或在渚寒藻舞沿洄逝川
渺東注睠然興我懷坐久無與語興盡還歸來

人生固有涯胡為苦形役晚歲賦歸與林間數椽屋紫
芝暎春榮白雲滿空谷怡雲更采芝泮渙吾自足易理
永垂訓所貴不遠復白日坐來暮且向山中宿

賞殘菊

養疴日高起袖手步前楹清霜萃百卉殘菊有餘馨愛

此傲霜姿巡簷掇其英掇英釀美酒酒熟當自傾人言
杞菊甘可以制頽齡頽齡安可制聊用陶吾情

閔菜

種菜關東園課童時灌畦禦冬藉旨蓄抱甕勤可辭戾
氣逐時作菜秀虫食之食葉猶自可食心根株推閭閻
多菜色歲饑薦加疲肉食忍獨飽喟然傷羣黎

聞鴈

旅鴈乘風翔薄暮聲嘹唳寒雲暝前途營營雙倦翼問

之何從來遠自沙塞北爾性固隨陽爾心乃謀食原田
有稻梁亦復多矰弋空濶蓼花灘胡不暫棲息

蘇司訓考妣雙挽

榮榮堂北萱零落秋霜蚤依依愛日心但願椿不老養
志夙所欣儒官詎云小東平來訃音別駕殯中道椿庭
回首空此恨終天抱風木號慈烏啞啞徹昏曉

和答王守谿少傅

陶翁樂天命乘化復奚疑乞身詎嫌蚤孔戡知二宜行

樂偶茲遊荏苒歲何其山林幸深密久與俗駕辭春池
芳草生秋菊白露滋冥搜窮萬彙野興隨四時金蘭邈
何許望望長相思

將至臨清感懷

昔年送嚴君清源艤舟待今日抵清源獨與妻孥會

庚戌

歲乞告送先君南還追至臨清始獲奉
侍今年家累先行亦至臨清相會也 筮仕兩還家先

後十七載

甲午偕計上京至庚戌始獲乞告又
自庚戌至丙寅先後皆十七年也 光陰如

轉燭不覺星霜改生還古所欣今幸偶然遂家山望非

遙庭幃痛安在鄉人誇畫遊吾心負萊綵臨風不勝悲
客淚空銀海

泊臨清遇雪

千林斷飛鳥萬里寒雲同朔風吹霰雪倏忽彌長空入
夜猶未已淅瀝鳴船蓬侵曉起推牖兩岸如堆瓊秋來
久不雨煖氣乖深冬來年閏生意渴望憐村農素心重
憂國所願年時豐如今兆三白庶矣甦疲瘥

聊城懷古

戰國信多奇妾婦良足耻悠悠千載餘吾重魯連子信
義屈強兵堅城書一紙功成不自居長揖歸故里諸侯
欲帝秦寧蹈東海死砥柱回狂瀾流芳焰青史雖非孔
氏徒不愧天下士聊城已非昔高山勤仰止

答衍聖公

舟次濟寧衍聖公以書來迓
不及赴瞻望闕里悵然興懷

濟河經信宿闕里鬱宮堯禮樂餘三代宮牆富百寮淵
源洙泗合蒼翠栢松喬未遂振衣願空煩折簡招浮雲
寒擁日逝水暮侵潮冰凍愁將合鄉關望轉遙歸與心

正急仰止意難消
慚負賢東道
緘書首重翹

獨酌

杯盤恒自足
風月底須期
往事真成夢
清歡總是詩
塵喧隔市遠
晚色上簾遲
醉倒花間石
乾坤兩不知

但願一樽滿
何妨三徑幽
身常閒便足
事已老宜休
塵夢蘆生枕
風情庾亮樓
書無封禪稿
任待茂陵求

賀雪湖得馬

大夫不徒行
老足難為力
有馬借人乘
此道已非昔
雪

湖一款段往失今復得得失底須論代步良足惜曾記
魯論語驥祇稱其德汎駕亦何為尋詩隨所適坂無九
折途行不費鞭策過我勿憚煩青芻盈皂捫

山莊值風雨燈前寫懷

薄暮掩衡扉獨坐風雨夕孤燈影明滅虛簷聲浙瀝擁
爐撥寒灰焚香玩周易歲序倏云暮陰陽互相逼山林
深且密久矣托心跡有懷在何許茫茫烟水隔夜闌清
不寐曷以慰岑寂窓外一枝梅預報春消息

和御賜羅峯少保韻一章

明禋儼如在裸獻禮必親維茲孟春祀鳴鑾出嚴宸駿
奔藹百辟電矚凝蓋臣持論秉一德孝思賴以伸精誠
格九廟萬嘏天錫純腹心與手足恩義真一身維賢乃
至寶異瑞何足珍喜起方賡歌歡聲同兆民

再和羅峯先生宸韻一首

同方志乃合傾蓋即相親江鄉素寥闊何幸聯奉宸君
才本經世聖主方得臣事久論乃定道在志亦伸曩征

萃賢俊濟濟素絲純衰殘已無用念慮惟乞身丘壑自
安分敢謂席上珍惟應揚聖化去慰遐方民

徐善應西白軒次雪湖韻

卜居鄰泮宮道在地亦偏過庭悲失怙禮學思紹先惟
白乃受采所貴敦其原藏修面西牖日章由闇然惜陰
駒過隙養和玉生烟室中更何有泓穎清輝聯爽氣忽
朝來舉頭見龍泉天光與雲影靜晝時盤旋道心永無
寐坐對冰壺寒

和答王守谿少傅

形影兩不愧獨行胡徘徊苦憶素心人葭玉真相依
朱絃被䟽越不與俗韻諧會聚安可常離索良足懷岐路
啜楊泣素絲成墨悲尊酒對花飲倚醉歌莫哀拂拭金
盤陀壯心殊未摧閒雲偶出岫薄暮還歸來青雲幾萬
里渺渺雙鴻飛

寄員外弟

輕風吹客衣旭日焰行李南還遂初志老穉盡歡喜膏

車復踟躕牽情獨吾弟宦轍偶追隨數載同京邸晨昏
不暫離手足真相倚忽漫逍遙堂慚愧姜肱被一日成
三秋兩地各千里會合定何時惆悵殊未已寒雲淡更
濃斷鴈飛復止矯首倚蓬窓離懷逐流水

新正喜雨

早暝迄三冬新正纔一雨潤澤遍荒郊膏脉動深土憶
昨恒陽時淵泉皆斥鹵河渠斷舟楫負載衆良苦除夕
見兒童競作商羊舞東風扇祥雲入夜送甘澍始和已

應占節候將可數吾衰更何求所願豐年屢丁寧向兒曹
勤力事南畝時雨復時暘含哺腹頻鼓

題西涯篆書卷後感懷

端居數舊遊忽忽漸凋落懷哉西涯翁令德兼善謔追
隨三十年文字日相樂竭來各一方歲月驚電爍行藏
杳難期竟負卜居約夢寐或見之談笑宛如昨簡札時
往還良用慰離索如何轉盼間翁已不可作展卷覩遺
墨使我情懷惡長歌伐木篇悲風振林薄

寒夜吟

冬夜何漫漫展轉不得曙山城送寒更長短香難數憶
昔趨朝時夙夜畏遲悞夢中驚覺來顛倒著衣屨如今
足晏眠飽食慚逸豫祖生聞雞鳴慷慨忙起舞志士不
忘公而我已衰暮寒灰寧復燃顏牆詎堪朽末命孤重託
何以報殊遇擁被一酸吟枕席淚如注

勵學示貞五弟秀才

學也本謀道聞道若發蒙孰云苟佔畢而以圖自奉往

聖有明訓人心如穀種敷蓄貴勤力不勤乃蕪葺末學
更紛紜頰舌徒泉湧成功惟靜專一靜制羣動吾弟純
篤資抱璞知所重科第事抑末雲衢尚修永三北豈真
怯一鼓有餘勇下帷仍絕編沉潛對周孔

恭和御製聽講大學衍義詩

聖功本資學求道學所先道具人一心大原出于天進
修必有序治化乃均平大學示綱目燦然羅目前功至
德自固外物詎能遷宋儒衍興義口末窮其顛吾皇勇

緝熙光明火始然儒臣日分直勸講無間焉聖心契妙
理精言發長篇臣愚續贊和微衷罄勤拳

咏泉為宋通政乃翁作

鉅野擅幽勝源泉引慶長卜居元世業志道擬成章釀
秫延賓滿研硃點易忙閒來時一酌澹久日相忘酒渴
頻濡吻詩枯或潤腸濯纓塵滅跡洗硯墨生香桂籍多
分派芹宮賸采芳謾為曾點詠不作次公狂歸老真成
逸褰封荷寵光承歡羨萊子稱壽寄霞觴

江西官氏二烈女次雪湖韻

節義真大閑浮生僅朝露誰謂捐生仁乃出兩荆布濟
濟冠佩徒講習亦有數臨難輒易心寧愧所學負憶昨
大江西亮逆嘯而聚皎皎雙白璧不受纖塵污一死等
鴻毛裕若身為度頗聞官氏宗自昔遵王路世德貽範
謨奕葉昌胤祚丈夫槩可知大節況童孺詔旨揭門閭
褒旌豈虛譽

霑雨歎

密雲同四郊雨脚紛麻縷稍霽忽復陰晦朔宵難數淖
泥沒車輻冥烟失村塢小民深怨咨田家倍辛苦于時
當歛穫是處空場圃滯穗被原隰鉅艾傷沮如濕薪不
得燃濡粟那可杵晨炊不謀夕富室翻成窶杞憂夙所
懷天漏伊誰補翹首望晴曦清光邈何許安得掃重陰
一快萬物覩

界首驛寓長至書懷

甓社接高郵驛界兩湖淚官舟倦行役深夜暫留憇玉

律應黃鐘報道日長至拜舞違清班闕廷渺瞻企稽首
祝吾皇聖壽千萬歲雞鳴問前途新河號康濟夙昔饒
風波如今穩無滯平生康濟心視此發長喟蚤起效書
雲萬里無纖翳赫曦出東隅扶桑凝紫氣元化互推移
新陽已回地所願君子長共樂太平世

懷禹穴

居閒遂成懶春來偶尋勝杖策窮冥搜此約先已訂禹
穴幾千載宮牆餘數仞梅梁嚴護呵玉笥肅清靜石刻

經雨昏谷響隨風應旌旗憶東遊弓劍遺南鎮雖無羣
后朝猶聞六飛騁念哉水土平濟此烝黎病魚鼈未忘
憂家室何由慶端拜誠素心茲遊復乘興興盡扁舟還
歎息二難併重來會有期行止由天定

面牆為西賓王先生作

一室真環堵端居總面牆進修寧自蔽退息解深藏掃
榻塵無漬翻經隙有光沉潛思闕里寤寐見陶唐燈火
黃昏靜絃歌白晝長受墁非糞土充棟是書香沽酒當

頭過觀梅倚角芳春隨隣蝶至雨洗甃苔荒簷旭留冬
煖山風透晚涼窺雲穿甕牖待月轉迴廊俗駕何緣入
佳聲定遠揚我來試推倒同上振衣岡

種松苗

杪冬天宇霽陰崖冰雪消荷鋤向西崦課童植松苗衆
卉豈不榮未雪已先凋松姿貞且勁凌寒見孤標巖谷
勢幽阻土脈亦不堯栽培藉雨露但苦牧與樵樵牧苟
不侵拱把遂成喬當年手所植今已百尺條歲月尚吾

與見爾復昂霄湖山歸舊隱依雲結新巢嗟嗟赤松子
自昔成久要松間路不迷來往任逍遙

世壽堂為周僉憲作

一人闢區夏萬方歸壽域于時有天民壽百十有六陞
見來安車溫綸錫優復郡宴首賓席異數表鄉俗餘慶
流孫曾耄耄相嗣續五福惟壽先壽固人所欲衆情罔
不同君家胡乃獨天道本生生而亦因材篤世德厚栽
培膏澤賸涵育高堂揭華匾明言常在目于今有聞孫

况乃富天祿仁風載播揚憲度慎明肅崇基更加培永
以延後福

摘橘餽雪湖

馮公獨樂園木奴動千百蒼翠鬱成谿頻年自封植秋
實何纍纍清芬釀瓊液霜風旋披拂彈轉黃金色昨朝
驚一空頗怪穿窬客仁者物與同亡弓楚人得高堂具
甘旨此物良足惜我亦愛園居窈窕清溪側牛屯望雪
湖烟霞兩山隔陸吉與黃甘馨香通咫尺愛護勤兒童

秋來幸全璧慢藏戒在茲蚤向霜前摘承歡已不逮抱
恨徒朝夕錫類念封人墮地懷陸績傾筐一分遺聊用
寄吾臆

食瓜有感

衰年困炎燄閉門卧山房忽聞戶外聲呼童倒衣裳僕
擎兩瓜至初熟請翁嘗大盜試載浮輕刀如截肪入手
玉飛屑薦齒永含香豈惟清渴吻亦足漱枯腸憶昔忝
黃扉天厨出瓊漿二月中已破內園固非常東陵歸故

侯條忽幾星霜農圃理舊業園田嗟久荒勸課勤荷鋤
力至瓜蔓長蔓長味亦佳持以詫窮鄉流傳實異種沾
溉有餘芳野人知美芹何由獻君王回首九天上一飯
胡可忘涓埃未能報撫案徒自傷

峨眉雲

南望峨眉峯去天不盈咫東來千萬疊巍然獨尊峙旦
時或興雲雲興雨隨至瞻望倚方隅膏澤被遐邇比來
夏秋交妖魃忽為厲旱暵動旬月赤地幾千里山雲杳

無踪鄉民愁欲死無乃炎威酷雲與山俱靡朝來望山
巔雲膚觸石起焦枯懷更生疲癯不勝喜幹旋諒在茲
沾溉亦易爾胡為復吝施倏忽隨風駛悠揚遽天末敷
賁滿山趾滂沛定何時渴望殊未已為雲固山職不雨
乃山耻寄語謝山神無為孤仰止

次韻詠麻糖答雪湖

荒陬乏奇品屑稊成膏糖香分雲子白色轉鶯兒黃堅
膠凝鳳嘴柔曲回羊腸調劑或受和佐饗先得嘗仙洞

出花蓋頻斯來桂漿刀圭不遺末鼎鑊無留良沃釜嗤
季倫戴帽嗟彥光溫醇擬酥酪皎潔逾冰霜歲時具甘
旨秋穫豐茨梁膠牙默自固鼓腹歡欲狂初煎火亦急
止沸湯再揚流傳本鄉俗取笑宜大方盤餐幸苟足珍
名何敢當美芹知野人為君獻高堂弄孫值元旦敷筵
佐稱觴瓦礫合居後珠玉矧在旁陽春強答和慚愧不
成章

病起有懷東雪湖

籬菊傲青霜庭槐拂晴昊寒簾步前除愛此風日好伏
枕動旬月徑路生秋草晏起每科頭能避管寧少平生
炯雙眸眈眈空塵表遐觀凌太行俯矚滄溟小纖翳忽
為孽天豈息吾老閉門養沉晦虛室樂閒悄達人戒用
明至道貴冥杳獨醒對羣酣清白太分曉世路方嶮巖
塵纓顧縈繞習靜信良圖知幾明不蚤餘光幸來復衰
容覺枯槁形影兩不愧天真願相保浮名等身外安能
寘懷抱簡編夙所耽此志殊未了摩挲向明窓努力尚

金
卷五
探討寂寞賸同心
矯首城西道
鵲噪燈含花
衡門頻卻
掃一笑定何時
芳樽共傾倒

哀池魚三十韻

閒居學養魚
山池故深鑿
水深恣游泳
草近足饒嚼
萬物本吾與
雅志與魚約
數畧戒無侵
微生忻有托
旦夕坐臨池
魚樂吾亦樂
藻定預知潛
萍開忽見躍
始舍即悠然
稍閒遂咸若
信孚久相忘
覲影不復卻
於焉得縱鱗
安用尋巨壑
雖乏化龍姿
頗異求伸蠖
維時夏景長

當午暑氣薄梅天雨初霽山村澤不涸草滓積以淤土
苴汎而惡對時喜魚育藏垢恤魚瘼倉卒命僕夫黽勉
施畚杓冷澗出污穢澄波翻溷濁惡臭一濫觴中魚如
毒藥喁噏盡浮挺於物頓蕭索拯救術罔功慘怛心如
灼殃非城門及孽自主翁作憂之誠太勤愛之反為虐
揠苗嗤宋人種樹聞郭橐駝孔門貴多識周詩每咨度至
理固難窮細物胡不博愚因慮多得事戒忙後錯優游
詎知非閱歷乃先覺良醫三折肱失險牢著脚一咽乃

廢餐既醉識斟酌魚亡池尚存恐使成濩落緣木復求
魚庶用慰寂寞

歸田稿卷五

欽定四庫全書

歸田稿卷六

明 謝遷 撰

七言絕句

南旺湖

湖水平南北分流以濟濟寧臨清諸閘其源出山東萊蕪諸泉永樂間上命尚書宋禮

經營之漕路遂通
始免海運之艱

南旺湖通黑馬溝濟南汶北兩分流淵源直是徂徠出

真重前人為國謀

金少卿月夕二首
卷六
南北關河總會通
泉流分濟恰當中
供輸坐免鯨波險
千載洪圖仰太宗

舳艫銜尾轉儲胥
閘溜垂虹接漕渠
廟食龍王亦何事
可憐湮沒宋尚書

湖水經秋分外清
順風南下片帆輕
尋源不盡平生興
翹首萊蕪詠濯纓

北軒小飲次陳德孚韻二絕

嫩綠園林雨後天
漫開花塢會羣仙
落紅不遣家童掃

留取餘香薦客筵

松醪春澱玉缸香喜洽親朋笑滿堂山雨似知留客意
簷前向晚送微涼

和陳德孚見懷絕句五首

北窓人靜日從容臥看輕陰落磻松剩欲與君同採藥
萬山深處白雲重

擬憑大藥駐衰容蚤向山南植萬松未問茯苓今幾許
眼前贏得晝陰重

平生不耐抗塵容興在清溪石上松
卻喜年來人事少
衡門晝掩底須重

數畝山居膝可容老龍鱗甲手栽松
茅亭正在雲深處
長夏陰陰紫翠重

面面溪山列秀容鹿眠芳草鶴巢松
登臨不倦時乘興
直上雲峯十二重

題相如題柱圖

凌雲氣槩欲何如萬里橋邊駟馬車
詞賦偶緣楊得意

卻將負弩詫鄉閭

松雲白鶴

孤松偃蹇白雲深
返炤仍留半壑陰
老鶴有巢歸倦翼
箇中應不受塵侵

一醉韻

幽居贏得寸心寬
獨酌花前也盡歡
醉後不知明月上
醒來惆悵共誰看

酒量真同德量寬
昔年曾侍釐交歡
于今渴想頭濡墨

無惜因風寄我看

題菊壽上虞陳處士

古稀華誕屆重陽采采東籬菊正芳想見聚星堂上客
壽觴齊舉溢秋香

為制顏齡藝此花清芬全屬太邱家壽筵仍及重陽後
勝采金英泛紫霞

和西涯新構園亭韻二絕

獨樂園深引趣長江南有地亦宜桑素衣不怕淄塵染

京洛相忘即故鄉

諸葛當年美亦長
成都八百勝栽桑
南陽回首終遺恨
錦里祠堂是異鄉

對菊二絕

山庄過雨菊含香
十月中旬未著霜
天為衰翁留好景
賞心何必定重陽

呼兒插竹補殘籬
籬下經秋菊未衰
欲藉晚芳娛老眼
故教重護傲霜枝

苦雨二絕

向來井底欲生塵一雨如今動浹旬
爛盡晚禾方種麥
問閭疾苦向誰陳

昨朝新霽又沉霪
巨奈泥污巷陌深
七八月間愁渴死
當時何苦不為霖

潘南山辭祿已久銓曹忽薦之初詞甚嘉閱二載
陪點三次不果用乃知薦者之虛飾也因賦一
絕

飛李紛紛足豔陽春風何意到枯桑蕭然白髮丈人行

卻作少年三伴郎

縉紳間以陪點為伴郎蓋善謔也

牙藥餽雪湖因寄二絕

老來生計只加餐欲效張倉諒獨難餘齒無多願加愛
莫矜舌在忽衰殘

秋風蕭瑟未須悲天道虧盈自有時但得此身強健在

重徭凶歲謾支持

時歲既歎加以重徭頗為所窘故此奉慰

和林待用都憲雲莊二絕

生涯爭似故園長
田有嘉禾樹有桑
千頃白雲山萬疊
箇中真是地仙鄉

聞道雲庄野興長
山雲飄渺接扶桑
素心願結逍遙社
恨不移家共一鄉

摘柏次雪湖韻

霜柏枝高白
間紅珊瑚凌亂玉
璵璠芳膏擬作春臺燭
焰破羣陰大有功

雪湖自杭還辱示對雪見懷之作次韻二首奉答

因致問勞之意

雪窓坐對一燈青
遠道懷人倍覺醒
想見歸舟夜乘興
忍寒直過浙江亭

悠悠世路眼誰青
可是羣酣對獨醒
報道山園梅破臘
待君同上雪香亭

小仙壽意為魏二尹題

王母西池啓壽筵
羣仙歌舞正喧闐
是誰來獻蟠桃實
請問湖南吳小仙

葡萄為楊仲謹題

瑤池秋蚤動涼風
吹落玄珠萬顆同
拾取一枝聊把玩
只疑身在水晶宮

題范以貞太守去思碑

千里棠陰去後思
宛陵真續召南詩
流芳寧復需貞石
終古閭閻口似碑

和羅峯郊壇一首

萬世承祧歸聖哲
一時匡弼備公孤
嘉謨入告君無忝

尸素優游獨愧吾

又和羅峯郊壇一首

路入青雲凌紫閣調高白雪擅騷壇
耄年何幸從公後蹇步追趨更覺難

贈眷弟陳一之之任南昌司訓詩一首

吏部傳家美太常銀臺秋署倍增光
君今莫厭芹宮冷一脈書香足紹芳

癬瘡有感

癰瘡在告憶當時問勞慙懃荷聖慈畎畝老癰仍病癰
捫瘡懷舊不勝悲

思母懷德二絕為孫鄉作

鄉塾髫年鼓篋遊倚門長抱涉波憂石梁穩架慈闈杳
日日經行淚暗流

人羨孤甥亦肯堂西溪宅相倍增光當年造就伊誰力
白首銘心感渭陽

七言律詩

歸途漫興

初出城懷李西涯

乞身歸去荷溫綸當宁深仁念舊臣
犬馬力疲徒戀主金蘭誼重更懷人
鄉心已負青山久客路真慚白髮新
猶幸潞河水未合匆匆解纜問前津

蚤發潞河東何冬官

千里鄉心逐鴈飛晨光初動尚熹微
送迎深愧勞賓主今昨何煩問是非
自在沙鷗眠岸迥凋零霜葉掛林稀

十年京洛歸來晚猶喜淄塵未染衣

舟次曉起書所見

清曉推篷滿地霜舟人呵手弄帆檣孤村蕭索炊烟尠
高岸凌兢引纜長潦水帶冰趨瀚海寒雲夾霧擁朝陽
平生憂國心仍在回首神京一慨慷

與迥弟戲奕

飽飯舟中漫奕棋虧成何用置欣悲平吳論協推枰日
破賊功輕折屐時閒裏紋楸供伴侶老來駑馬倦驅馳

舊時睹墅荒蕪久今日歸來慰所思

舟中課兒誦習

一經舊業本家傳盛世遭逢亦偶然
匡濟已孤明主託繼承猶望後人賢
陶翁飲酒寧非達杜甫吟詩祇自憐
分付爾曹勤努力未來吾復任蒼天

夢先隴

先隴睽違十二秋夢魂合眼到松楸
覺來枕席頻清淚歸去帆檣足勝遊
逸少閒情還自誓淵明雅志復何求

金史紀事本末卷六
從今不負牛屯景烟月晴花共樂邱

蚤發臨清喜晴

昨宵風雪阻嚴程
今日前途喜復晴
萍水襟期成汗漫
鴻泥踪跡尚分明
舊遊乍覺三秋遠
歸路真誇五兩輕
海上閒鷗迎野老
向來塵席任誰爭

東昌道中遇雪

夜床冷徹舊青氍
蚤起推篷雪滿船
縞帶迎風輕著水
琪花拂樹遠連天
崢嶸閘溜懸冰柱
迢遞村墟破曉烟

為語兒童寒莫訝屢豐應復兆來年

東商茂林郎中二首

文毅公之子時
方總理河道

斯文鄉曲舊通家宦路相看幾歲華邂逅紅亭煩駐節
慇懃青眼未生花石尤風急仍留客都水司存遠建牙
南旺湖頭重分手碧波離思兩無涯

當年知己辱尊翁草野諸生揖上公璞玉久慚虛重價
芝蘭今喜見芳叢踈星向曉芒猶北潦水經秋勢亦東
欲寄椒漿酌松檟歲寒心跡後先同

朱節婦壽詩即彥明之母

瑤池絳燭藹芳辰青雀西來送喜頻
歡動綵衣歸上國香生壽酒熟先春
閭門詔旨旌慈節尊俎詩歌集縉紳
花甲纔週知未艾老天應念苦心人

次韻答

闕

冬官拯

德懋祭酒之姪時方專理沽頭諸閭

菲才久已成尸素宦路真宜避俊英
漫向江湖尋范蠡盛陳車馬詫桓榮
邦家末命孤先帝鄉里斯文屬後生
珍重通家情獨厚相逢青眼倍分明

謝溝闌阻風東黃敬夫

驛舟纔過下沽頭
竟日飄風阻謝溝
亂石狂沙深閉戶
酒杯棋局漫添籌
險夷有分真隨遇
行止無端可自由
寄語同途諸逆旅
前程何必歎淹留

舟次彭城同年洪憲副以書來迂賦一律奉答

淮揚封畛接青徐
滿道風霜按節初
雞黍偶成千里約
寒暄先枉一緘書
交情誰復如同掬
宦路吾方媿二疏
只恐相逢又相別
嚴程欲進更趑趄

呂梁阻風奉懷洪都憲年兄

望中雲樹兩馳情
風雨連朝阻客程
使介遠煩都憲節
交期不負歲寒盟
呂梁自昔開天險
禹貢如今賴地平
明日相逢成一笑
波濤過眼未須驚

次洪都憲韻懷馮佩之憲副二首

當年已怪馮唐老
一別于今又十年
洛社衣冠原有約
汝湖風月浩無邊
衡門舊業荒三迳
斗酒新歡擬百篇
更喜登臨隨意足
不勞重費買山錢

結社久慚違素約歸休今喜共餘年
悠悠世事俱身外點點霜華漸鬢邊
幸有賜金供客具漫勞郵卒遞詩篇
舊時行樂湖山在明月清風不用錢

京口遇鄉人聞得曾孫喜而有作

人報丹山又一雛客途尊酒足歡娛
傳家敢謂多陰德對鏡無煩鑷白鬚
歸去庭前添玉樹閒來掌上弄明珠
鄭公事業吾慚比舊笏惟應付阿瞿

偶逢鄉曲話寒暄報道蘭階雨露繁
林下舊遊歸一老

金史四庫全書
卷六
眼前新喜見曾孫公卿知己慚先德清白惟應遺後昆
囊底賜金供具足閒情寧復問田園

答馮佩之用前韻

高閣小車真渴望迎門一笑正新年聚星光燭稽山下
會老堂開汝水邊弄月吟風償宿債投匭報李續殘編
吾儕真率無蕪味卻怪何曾食萬錢

人日喜晴仍用前韻柬佩之

歲暮還家頻苦雨今朝忽霽喜占年陽回泰運開天上

風送春聲到耳邊
知已漫成怡老會
養生方學悟真篇
晚來聊試登山屐
踏破青苔滿路錢

佩之約會牛屯山
庄雨不克赴辱詩
見貺依韻答之

夜床欹枕到天明
客悶重隨舊雨生
雞黍真慚千里約
松楸未慰十年情
山中雲滿孤持贈
海上鷗閒遲結盟
明日携琴候蘿逕
已占鐘鼓報新晴

再次韻約佩之

金文四庫卷六
卷六
狂客歸舟戀四明
鑑湖春水應時生
澄波萬頃原無價
霖雨彌旬似有情
放浪形骸娛晚景
平分風月記前盟
剡溪雪棹猶乘興
簷鵲朝來已報晴

正月廿四日會佩之于牛屯山庄次韻

粗糲盤餐媿客筵
烹微晴日蚤春天
畫屏影落前巖樹
玉珮聲分別澗泉
雲載鶴還添暮景
雨催蛙動報豐年
杖藜無惜頻來往
老去溪山轉覺便

太宰屠公見過用前韻奉呈二首

華裾鳴佩擁芳筵
蒼柳墻梅焰遠天
檀板驟驚林外鳥
茗甌頻試竹間泉
山陰命駕輕千里
彭澤停雲近十年
社會從今成舊約
滄江來往一舟便

湖上春風列小筵
畫船輕漾水中天
行憐蠟屐開新徑
坐愛流觴曲引泉
京邸離懷頻入夢
江鄉交誼久忘年
山穀野藪休相笑
真率從來

送屠公出姚江奉和途中即事一首

四望潏潏麥浪平
午風村落遠雞鳴
寒帷到處兒童識

負弩驅時驛吏迎野水橫舟人欲渡山雲觸石雨還生
明朝同上龍泉頂一舉何妨累十觥

又和登龍泉絕頂一首

迤邐蟠龍接秘圖雨中臺殿晝模糊神仙勝境餘三島
狂客歸舟任五湖地近東冥先見日樹連南郭晚棲烏
高軒過處人爭訝一片冰清炤玉壺

次韻復賈揮使

韜畧勲名羨世官旌麾時復上騷壇才兼文武仍專美

念及瘡痍每問安海岳遙連門閤壯冰壺清映甲光寒
滹沱麥飯須存記不為時平獨飽餐

三月六日過佩之雪湖山庄次韻

雪湖千頃自天開十載幽期共此杯柳浪乘風輕蕩漿
挂巖經雨半封苔客衣香惹蘼蕪動農事忙驚布谷催
松下為予通一徑南岡從此破崔巍

再遊牛屯山庄和聯句韻答雪湖

佩之號也

碧山歸共太平年香社風流到海邊春入林間無數筍

雨餘樹杪幾重泉
烟霞怡老真成趣
農圃求師不吝傳
雪湖栽松得法
亦予授之也
相隔高岡纔咫尺
路通尤覺往來便

次韻答林待用都憲

碌碌塵羈媿北山
聖慈優老許投閒
長孫幼子書千卷
明月清風屋數間
晚眺有時隨鶴步
春眠無夢到鷓班
閩江越嶠神交地
杖履何由日往還

山庄楊梅熟摘奉
雪湖辱詩并惠乾
笋仍用林都憲
韻答之

每因苦筍憶家山不為黃公強乞閒玉版久嫌千里外
渭川今在兩湖間美專吳楚尤非昔清絕夷齊孰與班
慚愧投匏真野意慙慙瓊玖荷公還

五月十七日山庄避暑次韻答雪湖

蘭亭怪底不成章興在溪流曲引觴水竹舊居還老懶
盤餐雅會任清狂陶潛適俗悲塵網王績逃名托醉鄉
一曲滄浪歸晚棹荷風十里送新涼

山亭新構東雪湖

小結茆亭傍澗阿兩峯前後鬱嵯峨看山恰設支頤臥
問字何妨載酒過梵石路迴青嶂合鈎簾窻度白雲多
登臨不爽清秋約預遣家僮掃薜蘿

和潘南山山居秋懷

落葉蕭蕭擁暮林箇中行跡杳難尋雲連白石南山燦
雨急寒潮西澗深苦思旋添新鬢雪高懷輕撇舊腰金
秋光又到東籬菊斗酒何當共醉吟

和山亭聯句韻答雪湖

朝來爽氣滿西山山下幽亭稱我閒
落葉擁階風掃卻飛花渡水鹿銜還
呼童剪棘通虛谷引杖探泉過淺灣
醉後留題向深竹笑看龍籜解新斑

病目再和山亭聯句韻東雪湖

陶翁雅性在邱山晚歲看山喜更閒
三徑清陰寒不改千林倦翼暮知還
烟橫樹杪層分障風逗溪聲幾轉灣
數日養疴深閉戶庭前想見雨苔斑

病目再疊山字韻遣悶東雪湖

老來青眼只湖山造物何緣妬我閒
塵翳本空寧是色神光不遠未全還
霧中霜樹春三月雲外寒流玉一灣
卻憶西林有玄豹尋常欲就管窺斑

聞丕兒得請喜而有作

停車正自愛秋山又喜兒曹共我閒
牛隴草深將犢臥鶴巢雲暝引雛還
樵蕪作伴經巖谷堂構隨緣傍水灣
寒日茅簷長對面承歡何用舞爛斑

補和聯句東字韻三首效雪湖作

鴻泥踪跡忘西東舊業歸老如夢中
漠漠唐虞世已遠悠悠孔墨將無同
也知三島香難即但願一尊長不空
咫尺相過亦非偶望中雲樹常朦朧

高岡直接扶桑東小亭新構深谷中
主人自媿是逋逸梅花卻與孤山同
暗香一派出冰壑清風萬仞凌秋空
夜深紙帳眠未醒角聲吹起月朦朧

巢父掉頭歸海東宜休亭結梅花中
歲寒一節良自許春意滿腔誰與同
白鶴放時客在戶翠禽啼處霜漫空

素心伊邇每來往杖藜踏破雲朦朧

重陽和雪湖見懷二首

小亭不到又彌月佳節忽遇倍懷人采芳籬下共誰語
索笑簷前空自巡夙昔遠遊成汗漫只今高興猶嶙峋
天留老眼看秋色杖藜更約雙湖濱

幽齋坐臥養衰疾知天久矣寧尤人未容白髮便干丈
誰說愁腸時幾巡紅樹夕陽競爛熳碧山秋氣增嶙峋
乾坤勝景肯辜負還擬尋芳窮水濱

再疊前韻酬雪湖

少陵有詩驅瘡鬼公詩亦合傳萬人

來札有文字愈病疾之語故云

眸真與緘並啓笑口不知杯幾巡西郊停雲樹香靄東
籬采菊山嶙峋芙蓉焰水秋未老濯纓還共滄浪濱

病目初愈用前韻寫懷

經旬伏枕謝塵俗竟日冥心懷古人韋編遜志未三絕
泗水尋芳時一巡靜掩衡門遂潦倒回思阿閣慚嶙峋
東窓晴旭焰蓬鬢起來獨步秋澗濱

十月三日會馮雪湖潘南山于牛屯山庄夜宿次

聯句韻三首

山前款段踏霜來一笑迎門望眼開
會老紆徐重負約登高強健尚能陪
鬢隨年改緣多病志與時乖愧不才
謾向空林歎搖落寒香佇看遶亭梅

溪頭坐對夕陽明風葉隨人似有情
松菊未荒歸老地鷺鷥曾結洗心盟
潭凝潦水連天碧山抹晴嵐隱樹平
鄰叟好懷晨饋鯉濁醪呼取盡餘觥

風璫入夜雜松濤旋摘佳蔬薦白醪林下勝遊重結社
燈前衰影舊同袍月明野渡漁歌杳露落孤桐鶴唳高
酒醒山堂塵慮寂熟眠不遣夢魂勞

贈屠太宰被召北上

白雲嶺上不堪持携手河梁酒一卮鏡水稽山方有待
秋鴻社燕香難期先朝燕翼餘耆舊今日龍光重倚毗
當道故人如問及為言多病已成衰

雪湖見過冒雨而歸漫成一律奉寄

海風吹雨晝霏微瘦馬衝寒薄暮歸信宿未償東道約
晨昏真念北堂違春暉寸草心良苦晚景黃花會亦稀
望望湖堤烏帽遠濕雲停處鴈低飛

和雪湖長至感興

忽漫歸田又一年故鄉風物總依然履長自喜迎新慶
怡老惟應續舊緣曝背南簷真負日舉頭北極遠瞻天
草深逕路闕重閉踈拙生涯靜獨便

又和方橋道中見懷之作用前韻

方橋徒步記當年今日經過一愴然老去杜門深避俗
閒來命駕偶隨緣乘桴嗤我從浮海鍊石憑誰詫補天
邂逅行窩仍一笑聯床剪燭話心便

雪湖冒寒西歸用前韻奉懷

兩人相對各衰年羨子清癯獨竦然振策遠猶輕步履
據鞍高不廢攀緣瀟瀟風雨衝寒地渺渺村墟向晚天
怪底王猷夜乘興雪舟自與苦吟便

閒居遣興二首用雪湖韻

園田歸老幸逢年鄰曲相看每粲然素食半生違夙志
黑甜一枕遂良緣網緼野馬窓前日嘹亮賓鴻雪後天
漫取南華經細讀閒居惟有養生便

百事無營學引年虛窓生白思悠然韋編課子供消日
竹院逢僧話結緣山徑半坡黃犢草湖波千頃白鷗天
藍輿畫舫時乘興光景無邊意總便

山園見梅用前韻柬雪湖

山雪初晴欲暮年蚤梅花共雪紛然茅亭佳景新成趣

紙帳清香舊有緣
白鶴步虛簷外月
素娥粧倩洞中天
賞心應有凌寒客
杖履來過野興便

疊前韻

村居臘盡未知年
忽見梅花一惘然
高咏尚餘東閣興
幽期不負北山緣
香凝夜壑留殘雪
影落寒潭炤遠天
漫論調羹須結實
乾坤清氣久相便

咏梅再疊前韻二首 酬雪湖

梅花契濶幾經年
歸見梅開倍悵然
牆角一枝勞夢想

歲寒三友結心緣
畫屏香細春藏塢
羌笛聲高月在天
踏破石崖看不厭
雪中驢背興猶便

手植寒梅不記年
年來珠玉競森然
溪山入畫真全景
雪月如期本夙緣
仙種舊分清絕地
踈枝遙倚沈寥天
任教桃李爭春色
冷淡風光性自便

祠堂新構用雪湖韻述懷二首

白屋栖遲本固窮
青雲寥廓悞登崇
永思端荷流光遠
優典真逢泰運隆
溫飽平生俱分外
孝忠兩字只胸中

同休願效華封祝國祚無疆日正東

陋巷紫迴路不窮庭槐陰護短墉崇苟完愧我培基淺
元吉從天藉棟隆享祀有儀還道古音容無地每虛中
春光又喜生門戶昨夜遙瞻斗柄東

寄母舅教授

時在蜀中

停雲靄靄夕陽斜路入西川望眼賒丹藥未成難卻老
錦城雖好不如家東風門巷重栽柳逝水年光幾及瓜
酒熟山中春又到何時相對看梅花

臘月十八日與馮雪湖潘南山會宿山亭次韻聯

句

屋角梅花映雪清
石頭路轉入雲平
盤餐供客聊隨分
箕踞看人直任情
侵曉開籠開放鶴
先春荷鋪漫移橙
素心良會頻難得
深夜清樽待月明

菊枕藤床午夢清
起來江上晚潮平
酒盃到我偏無分
丘壑于今勝有情
稚子籬根迷舊竹
木奴霜後壓香橙
剡川一曲春長滿
合與知章老四明

疊前韻酬雪湖

兩湖流水接天清，十里湖堤入望平。
詩札往還如索債，歲華更代總忘情。
酒須家釀多栽秫，果雜村拌或薦橙。
石鼎一篇殊未已，春宵燈燭待彌明。

生辰辱雪湖賀章依韻奉答

流光荏苒仍初度，世路優游媿此生。
身健不嫌雙鬢短，歲寒惟守寸心貞。
醉鄉高臥宜衰晚，壽域宏開荷聖明。
珍重故人來遠祝，鶴南飛共雪梅清。

小除日赴縣習儀途中有感

去年此日始還家轉盼乾坤又歲華猶記行裝遲暮雨
喜看野色炫晴霞纏腰人說能騎鶴添足吾慚學畫蛇
漫向東風問索笑寒梅踈竹籬斜

和雪湖元日紀興

笑看兒孫遶膝前滿斟椒酒慶新年任教白髮持公道
久與紅塵謝俗緣野老平安山竹報江春消息隴梅傳
扁舟莫負尋芳約萬頃晴波足剡川

和雪湖人日見懷

曉來羣鵲遶簷前
報道今年勝去年
柳眼送青如有約
鬢絲添白豈無緣
桑田夜雨催星駕
詩禮家風習舊傳
會待春深試春服
與君相伴浴沂川

和潘南山新春之作

崔巍黃道自天開
婉婉青陽驀地來
冰泮河流魚欲上
雪晴沙渚鴈初回
行逢新歲虛增筭
慚負先皇誤育才
憂國寸衷殊未泯
願看玉燭照春臺

和雪湖山庄有懷

探春擬上最高峯數日春寒意尚慵
陰壑流澌餘舊雪濕雲將影落疎松
人間元夕譁燈市天外新晴報寺鐘
選勝尋芳頻有約吟鞭到處願追從

教授舅還自蜀過于越城喜而有作用前韻

酒旗搖颺柳枝斜邂逅山城酒漫賒
宦海十年甥念舅春風萬里客還家
白雲嶺岫多藏藥靈雨園田蚤破瓜
杖履從今共行樂比來雙眼欲生花

越城覽勝六首次雪湖韻

登叢山

右軍故居今為戒珠寺

散盡春陰萬象融
叢山高起跨垣墉
戒珠寺古遺荒逕
洗硯池深映遠空
上界梵鐘將入定
小橋角扇尚清風
綦蕪不獨蘭亭勝
千載斯文感慨同

遊梅山

梅福隱處故其山以梅名

野寺晴鐘出遠林
仙家遺跡古猶今
斷橋對峙清溪曲
小徑斜通綠樹陰
望入市門勞企想
坐來丹井動豪吟

卜居便欲從茲始且共山僧話洗心

遊陽明洞

溪橋過雨路初乾步入陽明眼界寬
酒甕峯迴開罨畫羽衣人去剩還丹
青鞵布韞真乘興野藪山饒漫合歡
塵慮頓空留竟日不知三島在人間

登龍山

迤邐岡巒隔市塵嵯峨臺殿集高真
天低象緯先分曙地接蓬壺獨駐春
大府建牙森檠戟仙壇煮石足荆薪

滿前多景真奇絕老眼于今又一新

和答陸靜之太守二首

客懷十載繫山陰世路紛囂不耐侵
道與志同宜結社病隨年至即投簪
乾坤俯仰皆陳跡丘壑優游足賞心
見說蘭亭舊風景尚餘修竹茂成林

春雨初晴起晏眠韶光凌亂逐吟鞭
輭紅塵土今無夢晚翠林巒舊有緣
野渡潮平魚艇集杏村風煖酒旗懸
與君重訂尋芳約班白相隨不偶然

酬雪湖見懷二首用陸韻

轉眼紅芳又綠陰
遊絲飛絮漫相侵
衰顏未必輸青鏡
短髮惟應怯舊簪
坐待白雲歸洞口
臥看明月到天心
懷人正復勞傾企
啼鳥嚶嚶隔遠林

小齋無事足春眠
乘興尋芳偶著鞭
苔石漫供醒酒具
鷗波重結洗心緣
東園茆李迎風笑
別壑藤蘿帶雨懸
相伴浴沂慚負約
湖邊凝睇思悠然

三月十四日賈汝易馮雪湖同過山亭小飲次聯

句韻

振衣同上白雲岑宿雨初晴春正深流水落花紆曲澗
煖烟芳草護長林雩風入咏聊言志園景凝眸總會心
猶道餘芳在幽壑杖藜徐步漫追尋

三月廿日王龍山太宰偕雪湖見過次聯句韻

倒屣衡門迓故人脩然風采共清真解衣呼酒春方熟
策杖看山晚更新三益有懷開筵竹八珍無譜薦溪蘋
閒身總是鷗夷侶同泛扁舟莫厭頻

次韻答表弟昕二首兼東廷臣舅

塵纓原不耐羈縻舊隱歸來已負期
適意漫憐手蠟屐
任真翻笑墨悲絲
端居閒靜聊觀物
飽飯優游只和詩
更是溪山看不厭
披雲尋月每忘疲

懶性年來幸脫縻
白頭行樂遂心期
春深綠野雙吟屐
雨後滄江一釣絲
邵老荐添栽藥圃
素餐猶媿伐檀詩
渭陽時有過從興
只恐肩輿僕告疲

四月十五日會雪湖于牛屯山庄次雨中聯句韻

白石峒崕綠樹重雨中烟景淡還濃遠雞報午遲村饁
靈谷占晴急梵鐘苔徑行踪雙屐補竹窓吟料四山供
勸農已見循良令匹馬西來一鶴從

五月初七日恭遇先帝忌辰不勝悲慟強成一律

用寫哀悼

翹首玄雲暗鼎湖餘生無路謁楸梧憂深漆室心如醉
淚盡烏號眼欲枯老病自慚孤末命夢魂猶憶贊訂謨
黃扉殘稿俱零落無逸惟存舊獻圖

次雪湖韻魏二尹乃兄還維揚

惆悵官亭柳一枝客鄉離合杳難期
路當樹與雲深處舟及潮隨月上時
棠棣分陰遙佇立鵲鵲聲急苦縈思
背萱卻喜春光滿歸去高堂捧酒卮

五月十二日與雪湖南山避暑山亭次聯句韻二

首

細簾高捲北窓涼茗椀時分石鼎香
水荇受風牽舞藻路槐穿日間垂楊
清虛未必輸三島笑飲何妨累十觴

野藪山散蕪海錯不嫌粗糲待君嘗

几席頻移趣綠陰倍因逃暑愛林深偶逢白石堪投足
漫和滄浪愜洗心遶屋桑麻迷遠近當筵瓜果任浮沉
及時行樂聊乘興卻怪癯翁太苦吟

五月初四日遊永樂寺次聯句韻呈同遊馮雪湖
魏邦直牧時庸諸君

乘興聊同汗漫遊江邊人詫謫仙舟山圍上刹曇花杳
地近中天顥氣浮鏡水風流真未減蘭亭禊事合重修

坐來頓覺煩歌淨卻訝松濤萬壑秋

汪公溥挽詩

瀏陽遺愛至今存陰德真宜裕後昆都水有聲分漢署
駟車何意負于門淵源家學非綿蕞清苦官箴只菜根
三世交情悲契濶臨風聊為賦招魂

賓陽軒為楊仲謹作

華軒高啓面隅夷似與朝陽宿有期海曙未分虛席久
簷暄欲滿上階遲門深屏障攢朱槿市遠盤餐勝露葵

我亦頻過候曦馭不辭傾倒卯前卮

憂旱次馮絢之韻

五月糶新顙望歲恒陽為虐重傷秋茫茫赤地塵千里
貿貿蒼生淚滿疇杼軸已空那忍見江湖未遠敢忘憂
天瓢一滴誰能挽會使霑濡遍九州

喜雨用前韻

焦枯久渴雲霓望一雨如膏尚及秋臥聽歡聲動比屋
起看生意滿平疇至誠真應桑林禱衰病全忘杞國憂

更願皇天均霈澤直從瀕海到神州

次韻答西席陳思誠

荒齋不厭舊氍寒萍水情真自古難身在靜中便獨坐
眼當青處喜相看門無俗駕喧賓席園有嘉蔬具午餐
鎮日玄關談未徹好懷寧與歲俱闌

次雪湖韻贈魏邦直服闋之京二首

老眼逢人不慣青為君岐路倍分明百年宦學承先志
三世交遊感別情天外暮雲春樹合江頭新水蚤潮生

一尊未盡離亭意唱徹陽關更幾聲

輕烟搖颺柳梢青雨後澄波炤眼明驥躡雲程方展足
烏啼風木尚含情一經舊業宗韋氏三策高才羨董生
當宁懷賢虛席久鄉閭洗耳聽蜚聲

次雪湖韻柬華廷禧少叅

徑草春深晝掩關老來贏得此身閒任教雲雨時翻覆
最喜金蘭日往還白鷺渚空添野興青精飯熟駐衰顏
從今願結逍遙社赤壁丹崖試共攀

金華山志卷六
山莊懷雪湖一首

時雪湖丁母憂

秋山無伴倍思君，倚杖前溪對夕曛。
老恨皐魚重泣血，閒憐子夏久離羣。
悲風入夜號林木，倦鳥歸巢背岫雲。
孤負西堂明月夜，何時剪燭更論文。

次韻答一清楊丈

凋零霜葉滿空山，寂寞寒潭露淺灣。
列壑有情容寄傲，趨朝無補合投閒。
松筠逕僻春長在，芋栗園收歲未慳。
少小相知今白髮，且憑樽酒共開顏。

次館賓何天雨留別之作

漠漠同雲歲正寒
梅花又見出林巒
舊書滿案供兒課
長缺無魚媿客彈
高臥優游門自掩
狂歌激烈酒初闌
坐羶不厭年來薄
青眼相看未盡歡

雪湖會屠元勳司寇于嘉禾辱聯句見懷依韻奉
答二首

遠辱魚緘帶笑開
詩逋又枉故人催
聚星堂向平湖啓
乘雪舟從剡曲來
大火西流時忽改
狂瀾東倒勢難迴

白頭敢忘先憂念朽木寒灰愧不才

簞瓢樂在慕顏回三逕荒蕪理舊開
遣興或羅門外雀
合歡時覆掌中盃
鴛鴦兒業勞頻課
踈絕朋緘不費裁
散髮松陰成獨坐
白雲遙送鶴歸來

贈余醫士

年來守口正如餅
閉戶端居百念輕
舌在祇防牙齒敝
氣和寧合贅疣生
奇功一匕真無價
妙術專門舊有名
也欲為君栽幾杏
碧波芳草若為情

贈會稽尹陳君玉陞四川憲僉之任君先以御史

左遷也

花縣驚看舊豸冠
疎林寧合久栖鸞
桓聰載驟人爭議
蜀弩先驅路不難
遺愛一番春雨足
清風萬里曉霜寒
鄰封方欲沾河潤
翹首行旌獨慨歎

賀潘南山弄璋

莫道商瞿子更遲
德門餘慶已先知
珠生老蚌何容易
鳳出丹山合應期
寶桂新枝纔輒茁
徐麟吉夢定追隨

玉缸春酒飛花滿
湯餅初筵醉不辭

大寒峯聯句
辛未三月與雪湖過潘南山因遊大

寒峯絕頂同遊者潘孔宜應陳德章燿也

尋芳遠上大寒峯
謝路入松雲紫翠重
馮草護石壇供

列座謝花迎
藜杖笑相從
潘拍天春漲飛鳧遠
馮出峽

晴巒斷靄濃
應勝景登臨
慚獨後
陳試題崖壁破苔封

謝

次聯句韻

禹穴東來第一峯登臨下見白雲重
蘭亭會喜羣賢集
赤壁遊憐二客從澗底笙簧風入細
松梢膏沐霧餘濃
醉翁賸得山中趣不羨侯家萬戶封

用前韻邀雪湖過我山庄

小車脂轄為迎君高閣凭欄日易曛
野色遙連晴樹杪
秋聲忽動暮鴉羣
盛時端合鳴東野
奇字猶應問子雲
行樂及茲強健在
瘦腰吾獨笑休文

疊前韻酬雪湖

金安口八
卷六
落落山齋此共君
秋高絕巘淨朝曛
池魚戲藻寒浮沫
野鹿銜花晝引羣
坐向楓林真愛晚
臥當圭竇漫看雲
箇中風景原無價
方外浮名直幾文

小箋饋雪湖辱佳咏依韻奉答

三徑真從竹下開
清風惟許故人來
樓成五鳳凌霄起
波躍雙魚帶雨迴
同事中書嗟我老
後生狂斐付君裁
兩都有賦知方就
舊價新增莫漫猜

重陽後一日李揮使山庄雅集雪湖先歸有作次

韻奉答

相約登高躡白雲雲中雞犬坐來聞小山叢桂留車轍
微雨空濠落鴈羣醉裡乾坤真自足老來風月合平分
吾方落帽公先去投轄虛煩李使君

用前韻酬李揮使

山樓雉堞壓層雲笳鼓聲高隔岸聞綠醕有情酬菊節
黃庭無意博鸞羣東來海嶼三峯出北轉池塘一逕分
老興婆娑真不淺年年此會欲煩君

再用前韻贈陸良弼太守

文采風流羨陸雲江東家世共知聞
喬松挺壑難為用孤鶴凌空自不羣
碧水丹山方有約虎符龍節又新分
師門事業吾慚負臨別丁寧說致君

和雪湖追憶史天瑞都憲并贈乃子鸞各一首

宿草泉臺翳暝雲白楊蕭瑟不堪聞
遼東鶴未歸華表冀北騶空憶舊羣
當路多蠅知旋息邊疆有閫歎誰分
墨池清影俱陳跡淚灑西風對此君

茂年奇氣欲凌雲詩禮趨庭日
飫聞桂子傳香真係籍
龍駒入駕定超羣青錢萬選文
俱中白璧連城價已分
佇聽春雷一聲動九原應復慰
嚴君

東塘耕讀 為毛推官作

東塘佳處結茅廬
遶屋畱畝滿架書
力盡犁鋤春雨足
坐深燈火夜窓虛
心田還裕兒孫業
腹笥寧論儋石儲
世祿于今真食報
向來生計復何如

次韻贈表弟鄒禮還海寧

相見渾疑歲月差，衰顏寧復舊時嘉。
未應伏櫪終淹驥，卻怪精金尚在沙。
身世有涯真逆旅，江湖何處不宜家。
明朝又隔錢塘路，雲樹微茫眼欲花。

次賓竹聯句韻二首為潘孔宜作

舊遊星散幾時還，杖履迎門笑滿顏。
節下詩多知會數，牆頭酒過破囊慳。
水從根出流杯筍，風入枝來雜珮環。
聞說初筵仍大嚼，何當著我主賓間。

溪雲深處碧森然，瀟灑門庭集晉賢。
衣脫錦綈仍散逸，

坐叅玉版漫周旋迴廊影轉如成約盤石涼生或對眠
信道主翁真愛客兩髯心跡久相便

雪湖過我締姻辱詩見貺依韻奉答

悠悠文具漸離真太朴于今試一新粗糲盤餐容易足
往來僕從不妨頻松蘿相倚三生願風月平分兩地均
一閱標梅歌侑酒兒童卻訝錦堂春

新歡聲動舊賓筵人訝瑤池會列仙弱息才慚非咏雪
賢郎學喜與知玄清臞笑看公強健老懶從嗔我醉眠

四美二難今日具惠風和暢杏花天

和答西涯見寄諸作致仕述懷韻

別時已怪雪盈顛一別于今又八年
詔許具瞻歸綠野
壽綏平格荷蒼天
滿門莠李兼新種
華國文章續舊編
遙想城西行樂地
平泉過雨正涓涓

夢裡相逢喜欲顛
追隨笑語似當年
幽懷方擬同尋壑
妙手俄聞輟補天

今春常夢公枉顧為湖山之遊數日後聞公休致矣

零落交遊

增舊慨太平歌咏入新編
陶情賸有盃中物肯向花前

不盡涓

見懷留別韻

黃扉十載共絲綸壯志相期作畫臣大塊推移終息老
浮生行止豈由人尋常野服隨身便忽漫韶華過眼新
若許扁舟同范老五湖烟水久知津

頭上涼颼透白綸葯籠頻檢識君臣行吟盡日無佳句
夢想終宵有故人松塢晝長茶竈熟秫田秋稔酒筍新
閒來偶試湖邊屐雨後蘋香水沒津

再用留別韻寫懷一首寄西涯

扁舟隨處漫垂綸
蕭散元非楚逐臣
回首雲霄慚負國
驚心歲月奈催人
夕陽影入汀洲遠
秋雨涼生枕簟新
為愛芙蓉思涉採
江波渺渺忘通津

贈表弟鄒景明之武平衛幕

憤齋抱璞竟沉淪
可是蒼天獨負人
蚤已成家誇令子
今當入幕羨嘉賓
詩書真見重餘慶
關柝誰言祇為貧
苦憶渭陽深念別
再陳先訓願書紳

贈表弟鄒克敬之來安司訓用前韻

醉樂峯奇盛隱淪雲程喜爾耀前人一經志苦專門業
三策名先利國賓泮水集英真樂育芹香分贍不憂貧
高歌青眼嗟予老洗耳芳聲動縉紳

中秋邀雪湖山庄玩月雨不至辱詩見貺次韻奉

訂前約

芳樽已辦酬佳節舊雨那堪長悶懷望絕山陽虛命駕
坐忘顏巷獨心齋清歡正擬羣賢集嘉話終傳二美偕

今夜光輝須勝昨
賡吟顓侯刻磨崖

中秋後一日雪湖偕乃弟綱之見過澄霽勝常疊

前韻紀勝

昨朝重翳孤成約
今夜澄輝愜素懷
萬頃玻璃涵桂窟
九霄沆瀣洗茅齋
山間勝絕塵埃淨
座上清真伯仲偕
老興婆娑殊不淺
夜深躡屐上懸崖

昨雨今晴渾莫定
山深林密好開懷
過雲聲度霓裳曲
近水光搖畫舫齋
千古月華今夕勝
百年心賞幾人偕

怪來坐久衣裳濕竹露因風墮翠崖

新搆杏山田舍雪湖以詩來賀次韻三首奉答

山趾西來水遶東箇中真趣傲王公
荷鋤當逕開茅塞抱甕沿流引澗通
冬煖淨依南牖日夏長高臥北窓風
先憂已愧吾衰老後樂何當物與同

並湖兩眺兀西東來往登臨枉鉅公
雲就暝時山頂出水長流處竹根通
濯纓古汊聊乘月振袂高岡或馭風
新菊滿籬花欲吐採芳顚待一樽同

汝水西頭勝灤東詩名邵愧少陵公衡門遁跡丹崖負
短策尋幽曲逕通欲制顏齡儲菊釀為清塵耳迓松風
雪湖遺老知心久時復相過話尚同

生辰辱雪湖詩祝次韻奉酬

殘雪空庭漫掃除滿堂淑氣晝晴初天開壽域迎春蚤
人在康衢擊壤餘老去蒹葭真倚玉朝來青鳥忽傳書
檇材邵愧靈椿祝手把郵筒捲復舒

甲戌元旦用雪湖祝壽韻寫懷

氤氲瑞靄溢庭除
六甲循環又一初
兒綵承歡春酒熟
賓筵供具賜金餘
古稀漸近慚虛度
大有將來願屢書
塵慮久空强健在
閒居贏得兩眉舒

人日紀興用前韻

舊氛都共雪消除
新歲宜人瑞應初
七日晴連元旦後
三陽澤布大寒餘
花栽春勝濃粧綵
梅落風簷亂點書
漫掃湖亭一登眺
海天雲盡暮霞舒

再疊前韻寫懷

靜中觀物悟乘除蚤向山間賦遂初歲紀不知成老大
生涯安用慕羸餘支持門戶承先訓勸課兒童理舊書
至樂底須歌鼓吹春來長日笑顏舒

穀旦復用前韻紀興

問閭逋負荷蠲除百穀占年慶喜初瑞雪經冬先有兆
妖蝗入地已無餘大田堅好傳周雅成賦均平準夏書
但願屢豐今日始萬方民物總安舒

元宵仍用前韻述懷

萬事俱憑酒破除獨醒吾亦笑當初歸休歲月三宜後
笑傲乾坤一醉餘舊社重尋怡老會當途久付絕交書
賞心又屆元宵節獨對青樽挹望舒

網之開館臨城借前韻奉賀

青衿濟濟列前除絳帳春風拂面初材本棟梁輸一第
業勤膏晷足三餘硯田俶載饒新稼腹笥翻騰出舊書
桃李滿城方蓓蕾忽驚甘雨應時舒

元宵苦雨臥病悶甚節後復晴霽可喜病亦稍退

輒復用前韻自述

悶過元宵頓覺除殘筵卻是賞燈初樓臺月破寒雲盡
村巷泥乾宿雨餘小學再寬兒節假病鄉那廢古方書
金蓮殊遇能忘得憂國深懷苦未舒

病起書懷仍用前韻

病魔全賴藥驅除遲日簾櫳睡起初碧落塵空風定後
滄洲水滿雪消餘潑醅正熟松花酒插架時翻貝葉書
分付掃門顯候客兒童省宇亦先舒

酬雪湖過訪仍用前韻二首

苔痕過雨上階除，忽枉高軒倒屣初。
歡動笙歌元夕後，芳傳梅柳蚤春餘。
相看翻訝三秋別，一話真勝十載書。
明日放舟湖上飲，波光溶漾綠蘋舒。

門逕尋常草不除，客來恰是踏青初。
一堂和氣春風裏，四海韶光曉雨餘。
酒德不嫌頻作頌，交盟何用再加書。
高懷獨負湖船約，水面晴雲自卷舒。

山庄懷雪湖仍用前韻

山徑蒼蕪漫剪除，澗阿方丈結茅初。
屏圍翠巘雲霄外，膏沐青松霧露餘。
丹藥竈須添石煮，黃庭經為換鵞書。
雨晴能枉登臨屐，同看前巖瀑布舒。

湖亭次公輕黃門韻二首

兒童歡笑引扁舟，適意真成汗漫遊。
烟破酒旗橫郭外，風傳漁唱出溪頭。
晴川柳色平分署，春水蛙聲預卜秋。
鷗鳥也知機息久，相隨容與綠蘋洲。

老來不惜買山錢，逵屋峯巒斷復連。
門掩榆槐聊避俗，

盤供蔬菜漫隨緣茅亭破雨牽蘿補茶竈當風掃葉燃
知已偶逢成一醉滿湖新水杏花天

山庄午節次韻酬雪湖二首

柳陰深處釣魚船風送荷香醒晝眠詩債漫償端午節
夢魂不到九重天青松列架雲橫壑白鷺羣飛水護田
一曲南薰消永日知音相遇兩欣然

半掩衡門不繫船醒時歌咏醉時眠逍遙笠屐湖邊路
箭鬱桑麻雨後天嘉會有緣憑入社素餐非分合歸田

古來莫逆真能幾
蚤晚相過一粲然

再酬雪湖疊前韻三首

謝卻門前問字船
北窓長日枕書眠
支頤漫看雲歸岫
散髮高歌月在天
留客可無醒酒石
乞身原有種瓜田
衰顏那得青精飯
秉燭相看一惘然

蚤學鴟夷理釣船
波心長對白鷗眠
移山笑我愚成谷
鍊石憑誰妙補天
雲外輓轡新甃井
雨中襪裊上平田
尋常文會輸真率
野菽山殽漫雜然

往來輕便兩湖船
修竹軒窓對榻眠
夙喜投閒歸洛社
老宜安分樂堯天
依稀景物新蓬島
牢落生涯舊石田
更約秋籬同採菊
見南山處思悠然

喜雨用前韻

涸轍生埃久廢船
桔槔聲急夜忘眠
平疇枯槁真憂日
比屋吁嗟苦望天
觸石片雲來遠岫
崇朝甘澍遍良田
極知帝力難消受
歌咏無能獨赧然

雨後過山庄懷雪湖仍前韻

雨後湖光入畫船
芰荷香裡倚蓬眠
淡雲疎樹懷人地
新水涼風逸老天
舊約不勞頻載酒
浮生何用苦求田
呼童預掃莓苔徑
落日孤琴倘惠然

小庄兀坐疊前韻遣興三首

並岸菰蒲浪泊船
野鳬披翼護雛眠
一川花氣新流水
萬壑松陰小洞天
老去衡門深草徑
年來斥鹵又桑田
曲肱蔬食皆真樂
卻笑陶朱學計然

筆床茶竈矮篷船
綠樹重陰起晏眠
馴鹿暮歸溪上月

驚魚時破水中天，鄰雞傍午催幽饅。
靈雨通宵足舜田，願取西成人共飽。
醉鄉深處樂陶然。

湖邊人識米家船，松月槐風伴我眠。
屋氣縈迴成海市，山光杳靄入雲天。
携鋤不剪庭前草，束躬耕墓下田。
欲覓洪崖何處在，登高凝睇思茫然。

雪湖過山庄仍用前韻奉酬三首

幻境真同夜壑船，與君相對且高眠。
有時唱和閒消日，無意行藏直任天。
山下草堂慚綠野，雲間松鶴訝青田。

蹇驢輕策湖南路人識尋詩孟浩然

林閣湖亭載酒船畫圖須出李龍眠棋方禦敵輸安石
詩不求工慕樂天香露瀉荷侵綠水煖烟生玉靄藍田
地當偏處心逾遠午睡醒時正闌然

豪來時復棹舫船茶臼無聲隱几眠風入疎松清徹曉
雨深豐草碧連天五千卷在聊撐腹三百塵空漫力田
卻憶班生獨何事遠將文字勒燕然

雨後再過山庄述懷呈雪湖六首

平湖新漲駛輕船芳草添茵愜醉眠車馬塵空山郭路
桑榆景好夕陽天過牆濁酒來村市同穎嘉禾出甫田
水底蛙聲真鼓吹夜來和雨更喧然

水面晴雲載滿船半坡新綠看牛眠風生翠簾不知夏
月到青樽一問天隨處好山皆樂地應時甘雨及私田
興來毋惜頻相就蔗境優游豈偶然

午風停卻採蓮船不奈蟬聲聒晝眠石竹淨遮炎燄地
山亭高起沈寥天無魚莫漫歌長缺多稼方當頌大田

獨恨酒腸元自窄兩蕉葉盡已頽然

前溪返炤入漁船老鶴歸巢倦欲眠樹杪嵐光停落日
雨餘水色共長天身方自在重茅屋家未全貧足芋田
時覺清風生兩腋凌雲氣在欲軒然

采菱歌動隔溪船竹几藤床正熟眠林逕逶迤康鹿洞
村墟掩映鷓鴣天閒情久已拋塵鞅生計何當廢硯田
世路風波無定在湖山相對只依然

雨中觀稼自搖船行見懷新喜不眠志慕陶翁深避俗

學慚孟氏亦知天當時匡濟無長策今日遺安只舊田
最是國恩酬未得鼎湖翹首一潸然

再酬雪湖見過仍前韻五首

詩懷強半在湖船雲影山光伴獨眠豹變正須斑隱霧
鵬栖安用翼垂天松風遙度驚秋壑梅雨遲通慶晚田
忽報西岡來款段足音空谷正跼然

會心時共弄漁船君去寧嗔我醉眠曲徑莓苔荒宿雨
洞門梧竹失炎天延年賸有燒丹竈抱璞能無種玉田

今夕不須重秉燭坐看明月兩醒然

收拾魚竿且泊船歸來一犬枕階眠
畫欄影轉簾垂地仙笛聲高鶴在天
投贈未酬青玉案從遊還傍紫芝田
靜中真趣忘言久坐對雲山雨嗒然

誰家簫鼓鬧湖船人自酣歌我自眠
蒼狗變時雲作雨老龍騰處樹參天
草坡歸犢皆詩料竹院逢僧豈福田
每為濯纓兼濯足滄浪一曲思泠然

風滿高林月滿船
蒼深雞犬不驚眠
尋常草閣寧無地

咫尺蓬壺別有天清話半空霏玉屑紅光一點燭丹田
韻非適俗兼衰老卻喜樊籠返自然

船字韻拾遺四首

綠簑青笠志和船懶性從來飽即眠花落卻嗔風掃地
雲開最喜日中天許身愚到從浮海課子勤方學種田
忽見空霄飛一鶴馭風清氣亦翩然

北垞南灣獨槳船眼花不到水中眠清虛界是真玄圃
朴野風存古葛天扶老正便方竹杖嘗秋卻愛蚤禾田

雲霓又渴三農望安得甘霖一霈然

千頃湖波一葉船白雲堆裡任閒眠
燈前誰話巴山雨
酒後真憂祀國天
大庇萬間慚廣厦
力耕方寸當良田
臨流炤見雙蓬鬢
俛仰乾坤一慨然

欲從瀛海泛樓船
仙路茫茫且自眠
樹擁歸雲將暮景
草深零露向秋天
五株彭澤新高柳
十頃成都舊薄田
蠟屐試乘溪上月
一聲長嘯髮森然

歸田稿卷六